

ԱՅՐՊԱՏԱԿԱՆ ՀԱՅՈՑ ԹԵՄԻ ՀԻՄՆԱԿԱՆ ԿԱՆՈՆԱԳՐՈՒԹԻՒՆԸ*)

Այժմ առաջ բերենք հաստատուած հիմնական կանոնադրութեան աւելի կարեւորութիւն ունեցող յօդուածները, տեղ տեղ մի քանի բացատրութիւններ կցելով:

Ընդհանուր կանոններ: «1. Իրանի վեհապետների չնորհած բաղմաթիւ բարձրագոյն հրովարտալիների համաձայն՝ Պարսկաստանի հայ ժողովուրդը ազատ է կատարելու իր կրօնական պաշտամունքը և կառավարելու իր եկեղեցական-համայնական գործերը ըստ հայաստանեայց եկեղեցու կանոնների և ծէսի ամբողջ պարսից պետութեան սահմաններում արեղ-նափայլ շահնշահի բարձր հովանաւորութեան ներքոյ: 2. Ատրպատականի հայոց եկեղեցիք և համայնքը՝ իբրև հարազատ ժառանգներ ս. Լուսաւորչի գահին և Մայր Աթոռի, ենթարկուած են նորին վեհափառութիւն ամենայն հայոց հայրապետի ծայրագոյն իշխանութեանը: 3. Ատրպատականի եկեղեցական-համայնական բոլոր հայ պաշտօնեաները, թէ՛ հոգևորական և թէ՛ աշխարհական, Իրանի վարչական գործունէութեան չրջանում ենթակայ են թեմական իշխանութեան իրաւասութեանը: 4. Ատրպատականի հայոց համայնքը իր կրօնական և եկեղեցական-համայնական գործերում կախուած է միմիայն հայաստանեայց եկեղեցու իշխանութիւններից, որոնք առաջնորդուած են հայոց եկեղեցու կանոնական իրաւունքով: 5. Իրանի վեհապետների չնորհած բարձրագոյն ֆիրմանների համաձայն՝ հոգևոր աստիճան ունեցող հայերը իրանց ընտանիքով հանդերձ ազատ են մարմնական պատժից, ամեն տեսակ հարկերից և բէգեարից: 6. Ատրպատականի բոլոր հայ հոգևորականները ու եկեղեցական-համայնական պաշտօնեաները կարող են իրանց հաւատա-

*) Տես «Մուրճ» № 6:

րիւմ և եռանդուն պաշտօնավարութեան համար պարգևատրուել իրանի արեգնափայլ շահնշահից և ամենայն հայոց վեհափառ կաթողիկոսից՝ Ատրպատականի թեմական ժողովի որոշմամբ և թեմի առաջնորդի մեջնորդութեամբ»

Այս յօդուածներից (1-6) երկրորդը Թիֆլիսի նախագծում բոլորովին չը կար. միւսները հիմնական կանոնադրութիւնը առաջ է բերում աւելի կամ պակաս կարեւոր փոփոխումներով և լրացումներով:

«7. Հայոց իւրաքանչիւր եկեղեցական-համայնական կըրթական կամ բարեգործական հաստատութիւն (գրադարան, ընթերցարան, հիւանդանոց, որբանոց, ռեսուսնարաններ ևայլն) պիտի լինի սեփականութիւն որեւէ եկեղեցու կամ վանքի և չէ կարող անկախ և ինքնուրոյն իրաւաբանական անձի գոյութիւն ունենալ: Այդ հաստատութիւններից իւրաքանչիւրը իրան յատկացուած գոյքից օգտուում է և կառավարւում իր յատուկ կանոնադրութեամբ: 8. Իւրաքանչիւր ծխական եկեղեցու կամ վանքի պատկանող, այլի որեւէ կըրթական կամ բարեգործական եկեղեցական-համայնական հաստատութեան յատկացուած գոյքերը համարւում են ընդհանուր անձեռնմխելի սեփականութիւն հայաստանեայց եկեղեցու: Այս մասնակի կըրթական և բարեգործական հաստատութիւններից որեւէ մէկի փակման դէպքում՝ նրան յատկացուած գոյքը ենթարկւում է այն ծխական եկեղեցու կամ վանքի տնօրինութեանը, որին պատկանում էր նոյն հաստատութիւնը: Իսկ որեւէ ծխական եկեղեցու կամ վանքի փակման դէպքում նրա գոյքը ենթարկւում է թեմական ժողովի տնօրինութեան»:

Այս երկու յօդուածը (7, 8) նախ՝ հաստատում են մեր եկեղեցու կանոնական իրաւունքով նուիրագործւած՝ եկեղեցական-համայնական գոյքի սեփականատիրութեան միութեան սկզբունքը, որով իւրաքանչիւր եկեղեցական մասնակի հիմնարկութեան և հաստատութեան յատկացուած գոյքը հանգրիանւում է բովանդակ հայոց եկեղեցու սեփականութիւն: Ինչպէս յայտնի է, նոյն այդ սկզբունքը հաստատուած է նաև ռուսաց օրէնքով (տես Օրինագրքի XI հատ. 1213 յօդ.): Երկրորդ՝ 7-րդ և 8-րդ կանոնների համաձայն ինքնուրոյն իրաւաբանական անձ են—եկեղեցիները (ծխական համայնքները) և վանքերը. իսկ ամեն տեսակի կըրթական և բարեգործական հիմնարկութիւններ՝ անջատ և ինքնուրոյն իրաւական գոյութիւն չ'ունենալով, իրաւաբանական անձ չը լինելով, իրաւական կախումն պէտք է ունենան որեւէ եկեղեցուց կամ վանքից, որին կից են գտնւում (իրաւաբանական մտքով) և որին պատկանում են: Կատարելա-

պէս անշատ և ինքնուրոյն չը լինելով՝ այդ կրթական և բարեգործական հաստատութիւնները «կառավարւում են և օգտւում իրանց յատկացուած գոյքից» համաձայն իւրաքանչիւր հաստատութեան յատուկ կանոնադրութեան. հետեւապէս, նայելով կանոնադրութեանը, կարող են դարձեալ որոշ չափի ինքնուրոյնութիւն և վարչական անկախութիւն ունենալ:

«9. Ատրպատականի թեմի կառավարութիւնը, հայոց եկեղեցու հնաւանդ սովորութեան համաձայն, հիմնուած է ընտրական սկզբունքի վրայ: 10. Ատրպատականի թեմում ձայն և քուէ տալու, այլ և ընտրուելու և պաշտօններ ստանձնելու իրաւունք ունեն այն բոլոր թէ՛ հոգեւորական և թէ՛ աշխարհական ազգայինները, որոնք առնուազն վեց ամիս ապրել են թեմի միևնոյն տեղում, վճարել են եկեղեցական-համայնական պատշաճաւոր իշխանութիւններից սահմանուած բոլոր եկեղեցական և թեմական տուրքերը և քսան և մէկ տարեկանից պակաս չեն: Յատկապէս թեմական ժողովի և թեմական խորհրդի անդամ ընտրուելու իրաւունքից օգտւում են երեսուն տարեկանից վեր հասակ ունեցողները»: 11, 12, 14 և 15-րդ յօդուածները տեւ վերևում առաջ բերուած յօդուածիս ընթացքում:

«13. Բոլոր պաշտօնեաները, թէ՛ հոգեւորական, թէ՛ աշխարհական, թէ՛ պատւաւոր, թէ՛ վարձատրելի, վերընտրելի են: Բացի յատկապէս յիշուած դէպքերից: 16. Թեմապատկան հասոյթների աղբիւրներն են՝ ա) թեմական եկեղեցական-համայնական տուրքեր և թղթատուրքեր. բ) թեմապատկան անշարժ և շարժական գոյքերի եկամուտներ: գ) Թեմական մոմավաճառութեան կրպակից, թեմական տպարանից և այլ ձեռնարկութիւններից ստացուելիք եկամուտներ: 17. Շարժական և անշարժ եկեղեցական-համայնական գոյքեր գնել կարելի է՝ մինչև յիսուն թուման ծխական ժողովի որոշմամբ և գործակալութեան խորհրդի թոյլտուութեամբ. իսկ յիսուն թումանից բարձր—թեմական ժողովի թոյլտուութեամբ: 18. Եկեղեցական-համայնական շարժական և անշարժ գոյքերը ծախել կամ փոխանակել կարելի է՝ մինչև երկու հարիւր յիսուն թումանի—թեմական խորհրդի որոշմամբ, մինչև հազար թումանի—թեմական ժողովի որոշմամբ, իսկ դրանից վեր՝ թեմական ժողովի որոշմամբ և ամենայն հայոց կաթողիկոսի թոյլտուութեամբ: 19. Ատրպատականի թեմում սովորական պատկերների հրամանը տալիս է գործակալ քահանան. չհասութեան կառավարման դէպքերում թոյլտուութիւնը տալիս է թեմական առաջնորդը. իսկ արտակարգ դէպքերում դիմելու է ամենայն հայոց վեհափառ կաթողիկոսին: 20. Թաւրիզ քաղաքը, որպէս Ատր-

պատականի թեմի վարչական կենտրոն, թեմական առաջնորդի աթոռանիստ քաղաքն է: Թաւրիղի առաջնորդարանումն է գումարւում թեմական խորհուրդը: Առաջնորդարանի ներքին մատակարարութիւնը (բացի կահաւորութիւնից) հոգւում է իր ոռճիկ հաշւից թեմակալ առաջնորդը: 21. Պատշաճաւոր իշխանութեան հրամանով և պաշտօնական գործով ճանապարհորդելիս՝ պաշտօնեաները կարող են ճանապարհածախս ստանալ թեմական խորհրդի հրահանգի համաձայն կամ թեմապատկան կամ ծխական գումարներէց և կամ ի հաշիւ գործին մասնակից մասնաւոր մարդկանց: 22. Այս հիմնական կանոնադրութիւնը լրացնել, փոփոխել կամ որեւէ յօդուած դուրս զցել կարելի է թեմական ժողովի որոշմամբ (տես յօդ. 28) և ամենայն հայոց կաթողիկոսի թոյլտուութեամբ:»

Այս քսան և երկու յօդուածը հիմնական կանոնադրութեան ընդհանուր կանոններն են:

«23. Պարբերաբար, ամեն չորս տարին մի անգամ, Ատրպատականի հայ ժողովուրդը թեմական ժողով կազմելու համար պատգամաւորներ է ընտրում չորս տարի ժամանակով: Պատգամաւորներ լիազօրութեան քառամեայ ժամանակամիջոցը լրանալուց երեք ամիս առաջ՝ թեմական առաջնորդը կամ սրան փոխարինող առաջնորդական տեղապահը, իսկ սրա էլ բացակայութեան դէպքում թեմական խորհրդի աւագ անդամը չըջարեական է ուղարկում թեմի բոլոր եկեղեցիներին, հրաւիրելով ներկայացուցիչներ ընտրել գործակալութեան ժողով գումարելու և պատգամաւորներ ընտրելու համար: Ծխական ժողովներից ընտրուած ներկայացուցիչներից գործակալութեան ժողովներ են գումարւում (տես յօդ. 56), որոնք և ընտրում են պատգամաւորներ թեմական ժողովին անդամակցելու համար: Իւրաքանչիւր գործակալութեան ժողովն ուղարկում է առնուազն մէկ պատգամաւոր. իսկ բազմամարդ գործակալութիւնները իրանց համայնքի իւրաքանչիւր երկուհարիւր տան համար ուղարկում են մի-մի պատգամաւոր (վերջին երկու հարիւրը կարող է լրիւ չը լինել, բայց ոչ պակաս հարիւր մէկ ծխից): Ծանօթութիւն ա. գաւառացիք կարող են պատգամաւոր ընտրել նաև թաւրիղաբնակ ազգայիներից և առհասարակ գրօնցիներից: Ծանօթ. Բ. իւրաքանչիւր պատգամաւոր պէտք է լիեմական ժողովում ներկայանայ՝ իր լիազօրութիւնը հաստատող վկայականով, որը ստորագրուած պիտի լինի գործակալութեան ժողովի նախագահից և անդամներից և վաւերացուած գործակալական խորհրդի կնքով: Ծանօթ. Գ. (տես վերևում առաջ բերուած), Ծանօթ. Դ. հին պատգամաւորների լիազօրութիւնը

չարունակում է մինչև նոր պատգամաւորների ընտրուելը: Ծանօթ. ե. թեմական ժողովի կազմի և սրա մէջ տեղի ունեցող փոփոխութիւնների մասին թեմական առաջնորդը իւրաքանչիւր անգամ զեկուցանում է ամենայն հայոց կաթողիկոսին:»

«56. Պարբերաբար ամեն չորս տարին մի անգամ իւրաքանչիւր գործակալութեան բոլոր եկեղեցիների ծխական ժողովները ներկայացուցիչներ են ընտրում գործակալութեան ժողով գումարելու համար: Իւրաքանչիւր ծխական համայնք ուղարկում է առնուազն մի ներկայացուցիչ, իսկ բազմածուխ եկեղեցիները իրանց համայնքի իւրաքանչիւր քսան և հինգ տասն համար մի-մի ներկայացուցիչ են ընտրում:»^{*)}

Հիմնական կանոնադրութեան այս երկու (23 և 56) յօդուածները փոփոխել են Թիֆլիսի նախագծով պատգամաւորների ընտրութեան համար որոշուած եղանակը: Թիֆլիսի նախագիծը այսպէս էր անօրինում:—Իւրաքանչիւր 15—20 տուն օրինական համախօսականով ընտրում է մէկ ներկայացուցիչ, իւրաքանչիւր 200 տուն կազմում է մէկ «ընտրողական չրջան», և իւրաքանչիւր «ընտրողական չրջանի» բոլոր ներկայացուցիչները (ուրեմն՝ մօտաւորապէս 10 հոգի) ժողովուելով նոյն «չրջանի կետրոնավայրում» (2)²⁾ ընտրում են մէկ պատգամաւոր թեմական ժողովին մասնակցելու համար: Այսպիսով Թիֆլիսի նախագիծը պատգամաւորների ընտրութեան գէպքում անտես էր առնում թէ՛ ծխական ժողովը, որի գոյութիւն ընդահանրապէս ընդունում էր, և թէ՛ գործակալական ժողովը, որի մասին ոչ մի ակնարկ չէր պարունակում: Սակայն թեմի վարչական հիմնական բաժանմունքներից մէկը—գործակալութիւնը^{**)} իր ժողովը ունենալու իրաւունքից զրկելու, մինչդեռ այդ իրաւունքը ունեն թէ՛ ծխական եկեղեցիները և թէ՛ թեմը, ոչ մի հիմք չը կայ, անշուշտ պակաս չեն լինելու այն գործերը, որոնց համար նոյնչափ յարմար և հարկաւոր կը լինի գործակալական ժողովի գոյութիւնն ու գործունէութիւնը, որչափ ծխա-

*) Այս 56-րդ յօդուածը ունի մի այսպիսի ծանօթաբիւն. «Իւրաքանչիւր ներկայացուցիչ պէտք է գործակալական ժողովում ներկայանայ՝ իր լիազօրութիւնը հաստատող վկայականով, որը պէտք է ստորագրուած լինի ծխական ժողովի նախագահից և անդամներից և վսեմացուած ծխական ժողովի կընքով:»

**) Հիմնական կանոնադրութեան 55-րդ յօդուածի համաձայն՝ «Ատրպատականի թեմն ունի տասն և չորս գործակալութիւն. այն է՝ Մակու, Մալմատ, Խոյ, Ուրմի, Մարաղա, Մուժամբար, Երզարիլ, Մեղափար, Տզմար, Մնջուան, Քէյվան, Թաւրիզ, Սոուրլուար, Սուլդուզ:»

կան ժողովի և թեմական ժողովի գոյութիւնը հարկաւոր է համապատասխան գործերի նկատմամբ: Ճիշտ է, հաստատուած հիմնական կանոնադրութիւնն էլ բաւականանում է գործակալական ժողովի գրեթէ լոկ գոյութիւնը յայտարարելով (իսկ նրա կատարելիք գործերից առայժմ յիշում է միայն պատգամաւորներ և գործակալական խորհրդի անդամներ ընտրելը), առանց որոշելու գէթ ընդհանուր և գլխաւոր գծերով այդ ժողովի գործունէութեան և իրաւասութեան շրջանը: Բայց գործակալութեան ժողովի գործունէութիւնը և թեմական ու ծխական ժողովների հետ ունենալիք վարչական յարաբերութեան եղանակը որոշելը միայն այն ժամանակ հնարաւոր և հարկաւոր կը լինի, երբ տեղական այժերը և պահանջները զարգանալով և հասունանալով՝ այդպիսի օրգանի ընդարձակ գործունէութեան կարիք առաջ կը դադարէ: Յամենայն դէպս՝ կատարեալ հիմք կար այդ խնդրի աւելի լիակատար կարգաւորումը տեղական համայնքի նախաձեռնութեանը և ապագային թողնելու, շատանալով միայն նրանով, ինչ որ գտնում ենք ներկայ հիմնական կանոնադրութեան մէջ: Իսկ գործակալական և ծխական ժողովների գոյութիւնը ընդունելուց յետոյ այլևս արհեստական «ընտրողական շրջանների» կարիք չը կար. հէնց այդ ժողովները ամենայն պաշտօնութեամբ կարող են կատարել «ընտրողական շրջաններին» յանձնուած ընտրութիւնները: Գործակալական ժողով չ'ունենալով, Թիֆլիսի նախագիծը նոյն արհեստական «ընտրողական շրջաններին» էր դիմում նաև գործակալական խորհրդականների ընտրութեան համար, որ հիմնական կանոնադրութիւնը յարմարութեամբ յատկացնում է նոյն գործակալական ժողովի իրաւասութեանը: Բայցի այս յարմարութիւնից, հիմնական կանոնադրութեան յիշեալ յօրինուածքը նաև այն առաւելութիւնն ունի, որ յար և նման թեմի հիմնական վարչական բաժանման, թեմի հիմնարկութիւններն էլ մի ներգանակ և լրիւ սխտում են կազմում: Գործադիր և մշտական հիմնարկութիւններին (թեմական, գործակալական և ծխական խորհուրդներին) զուգընթաց՝ հիմնական կանոնադրութիւնը գնում է նաև երեք ժողովական հիմնարկութիւններ (թեմական, գործակալական և ծխական ժողովներ)՝ որպէս կարգադիր և վերահսկիչ հիմնարկութիւններ իւրաքանչիւրն իր շրջանում:

Թիֆլիսի նախագիծը առհասարակ առանձին ուշադրութիւն է դարձրած եղել իշխանութեան գործադիր մշտական օրգաններին (խորհուրդներին) վրայ, աւելի խնամքով է կազմել սրբան վերաբերեալ յօդուածները. մինչդեռ ժողովների մասին

եղած կանոնները շատ պակաս չափով էին մշակուած: Որոշ հիմք կար ծխական ժողովին մի լատուկ գլուխ չը նուիրելու (այն ինչ ծխական խորհրդին նուիրուած էր ք. գլուխը, ուր սակայն մի քանի յօդուած ծխական ժողովի և երեսփոխի մասին էին խօսուած): Ծխական ժողովի նկատմամբ կարելի էր մէկերկու յօդուածով միայն բաւականանալ, որովհետեւ նոյն ծխական ժողովի մասին մանրամասն կերպով տնօրինում է «հայաստանեայց առաքելական ս. եկեղեցու ծխական կանոնադրութիւնը» (տես «Արարատ» պաշտօնական ամսագրում), որ մեր եկեղեցու համայն (ընդհանուր) ծխական կանոնադրութիւնը լինելով, մի քանի անշան փոփոխութիւններով գործադրելի է նաև Պարսկաստանի թեմերում: Սակայն, ոչ մի հիմք չը կար բոլորովին անտես առնելու գործակալական ժողովի գոյութիւնը և թերի կերպով որոշելու թեմական ժողովի նման նշանաւոր և հեղինակաւոր օրգանի գործունէութիւնը, ընդհակառակը շեշտելով և ընդարձակելով թեմական խորհրդի գործունէութեան շրջանը ի վնաս թեմական ժողովի իրաւասութեան:

Թեմական ժողովի գործունէութիւնը, իրաւունքների և պարտականութիւնների շրջանը որոշող 30-րդ յօդուածը հիմնական կանոնադրութեան այսպէս է տնօրինում. «Թեմական ժողովի իրաւասութիւնը: ա. Թեմական ժողովը իրաւունք ունի սահմանելու և հրատարակելու ամբողջ թեմի բոլոր գործերի և եկեղեցական-համայնական հիմնարկութիւնների և հաստատութիւնների համար պարտադիր կանոնադրութիւններ և կարգադրութիւններ, ղեկավարուելով հայոց կանոնական իրաւունքով և այս հիմնական կանոնադրութեան սկզբունքներով՝ նախապէս ներկայացնելով իւրաքանչիւր կանոնադրութիւնը ամենայն հայոց կաթողիկոսին ի հաստատութիւն: բ. Թեմական ժողովը վերին և ընդհանուր հսկողութեան և հաշւառութեան իրաւունք ունի թեմի բոլոր եկեղեցական-համայնական գործերում: գ. Թեմական ժողովը պատգամաւորներ է ընտրում թեմի կողմից հայաստանեայց եկեղեցու համագումար ծայրագոյն ժողովին և այլ եկեղեցական-համայնական ընդհանուր գործառնութեանց մասնակցելու համար: դ. Ընտրում է և հրաժարեցնում է թեմական առաջնորդին՝ ամենայն հայոց կաթողիկոսի հաստատութեամբ (տես 28-րդ յօդ.): ե. Որոշում է իւրաքանչիւր քառամեակի համար թեմական առաջնորդի և այլ պաշտօնականների ռոճիկը: զ. Քննում և որոշում է նոր վանքեր հիմնելու խնդիրը: է. Ընտրում է և հրաժարեցնում է պաշտօնից թեմական խորհրդականներին, փոխորհրդականներին և

վերաստուգող յանձնաժողովի անդամներին*) Ը. Քննում է թեմական առաջնորդի դէմ ծագած բողոքները և ներկայացնում ամենայն հայոց կաթողիկոսին: Քննում և վճռում է թեմական խորհրդի դէմ ծագած բողոքները: Թ. Քննում և հաստատում է առաջիկայ ներկայացրած համար թեմական խորհրդի կազմած թեմական ընդհանուր նախահաշիւը: Ժ. Քննում և հաստատում է թեմական խորհրդի անցած ներկայից հաշիւը, նախապէս լսելով վերաստուգող յանձնաժողովի զեկուցագիրը: Ժա. Ձանազան խնդիրների ուսումնասիրութեան համար, ինչպէս և այլ յանձնարարութիւններ կատարելու պէտք եղած դէպքում ընտրում է յանձնաժողովներ, իրաւունք ունենալով կարելիոր դէպքերում դրսից ձեռնհաս մարդկանց հրաւիրելու: Ժբ. Սահմանում և մանրամասն հրահանգով որոշում է թեմական եկեղեցական-համայնական տուրքերի (օր. Լուսաւորչի լուծման, պտուղը, աթոռահաս պսակադրամը, լուսագիրնը, հողեքաժինը...) և թեմական, գործակալական և ծխական խորհուրդներից տրուող, հաստատուող և վաւերացուող վաւերաթղթերի համար վճարելիք թղթատուրքի տեսակները, քանակը, բաշխման և դանձման ձևը: Ժանթ[ո]ւ[թ]իւն: Լւերքանչիւր ստացուած տուրքի մասին արձանագրւում է ժապաւինեալ մատեանում, և վըճարողին ստացագիր արւում: Իսկ վերցրած թղթատուրքի քանակը նաև նշանակւում է նոյն վաւերաթղթի վրայ:»

30-րդ յօդուածի այս 12 (ժբ) կէտերից Թիֆլիսի նախագիծը ունէր միայն գ. ե-ի մի մասը, է. Ը-ի մի մասը և ժ: և. կէտը նոր վանքեր հիմնելու փափուկ խնդրի լուծումը յատկացնում է թեմական ժողովին, մինչդեռ Թիֆլիսի նախագիծով այդ խնդիրը որոշողը թեմական խորհուրդն էր: Ժբ. կէտը, որ տուրքավճարման վերաբերեալ մի հիմնական կանոն է, Թիֆլիսի նախագիծում միայն մասամբ կար, այն ևս յատկացուած թեմական խորհրդի իրաւասութեան չըջանին: Մինչդեռ Թիֆլիսի նախագիծը նախատեսել էր տուրքերի միայն «քանակութեան և դանձման ձևի մանրամասն հրահանգով որոշելը», հիմնական կանոնադրութիւնը իր ժբ-րդ կէտում բացի դրանից նախատեսել է «տուրքերի և թղթատուրքերի» նաև «տեսակներ-

*) Այս վերաստուգող յանձնաժողովին համար հիմնական կանոնադրութեան մէջ կայ երկու յատուկ յօդուած. «33. Վերաստուգող յանձնաժողովը բաղկանում է երեք անդամից և երկու փոխանդամից և ընտրւում է թեմական ժողովից երկու տարի ժամանակով: 34. Վերաստուգող յանձնաժողովը գումարուելով սովորական երկամեայ թեմական ժողովից առնուազն մի ամիս առաջ, քննում և ստուգում է թեմական խորհրդի գործունէութիւնն ու ընդհանուր հաշիւը և զեկուցագիր ներկայացնում թեմական ժողովին (յօդ. 48, ժդ.):»:

րի և բաշխման ձևի սահմանելը: Այս վերջին խնդիրը Թիֆլիսի նախագծում անտես առնուած լինելով՝ անորոշ և տարակուսելի էր մնում, թէ ինչ իշխանութիւն որիէ պարտադիր եկեղեցական-համայնական տուրք և թղթատուրք սահմանելու իրաւունք ունի, որ անշուշտ տուրքերին վերաբերեալ հարցերից ամենակարեւորն է: Բացի այդ կարեւոր լրացումից՝ տուրքերին վերաբերեալ ծանրակշիռ հարցերի որոշումը բնական էր յատկացնել սչ թէ թեմական խորհրդին, այլ թեմական ժողովին, որ եկեղեցու համայնքի ընտրեալ պատգամաւորներից կազմուելով՝ նոյն համայնքի կաթիլ և անձնաւորութեան իրաւասու ներկայացուցիչն է հանդիսանում: Բացի այդ եւթը կէտերից (դ, ե, զ, է, ւ, փ, և փք)՝ 30-րդ յօդուածի մնացած հինգ կէտերը (ա, բ, գ, թ և փք) բնաւ չը կային Թիֆլիսի նախագծում:

Թեմական խորհրդի իշխանութեան սահմանը որոշում է հիմն. կանոնադրութեան 48-րդ յօդուածը: «48. Թեմական խորհուրդը ա. հսկում է թեմի բոլոր եկեղեցական-համայնական հաստատութիւնների և պաշտօնեաների վարչական գործունէութեան վրայ: Բ. Կազմում է թեմի եկեղեցական-համայնական հաստատութիւնների կանոնադրութիւնների նախագծերը և առաջարկում է թեմական ժողովին ի հաւանութիւն: Գ. Քննում և որոշում է եկեղեցիներ և եկեղեցական-համայնական կրթական բարեկործական հաստատութիւններ հիմնելու խնդիրը (նոր վանքեր հիմնելու խնդիրները քննում է և ներկայացնում է թեմական ժողովին ի հաստատութիւն): Դ. Նոր հիմնուելիք կրթական և բարեկործական եկեղեցական-համայնական հաստատութիւնների համար կազմում է և ժամանակաւորապէս հաստատում է կանոնադրութիւններ, որպիսիք պարտաւորապէս ներկայացնում է առաջիկայ թեմական ժողովի հաւանութեան. և. հրահանգներ է տալիս թեմի ստորակարգ եկեղեցական-համայնական հաստատութիւններին և պաշտօնեաներին, ղեկավարուելով այս հիմնական կանոնադրութիւնով, ինչպէս և ապագայում թեմական ժողովի կողմից մշակուած և ամենայն հայոց կաթուղիկոսից հաստատուած կանոնադրութիւններով և կարգադրութիւններով: Ժ. Եւթը թեմական խորհրդի յօրինած այս հրահանգների, ինչպէս և նախորդ դ. կէտում յիշուած ժամանակաւոր կանոնադրութիւնների օրինակները վաւերացուում են թեմակալ առաջնորդի կնիքով և ստորագրութեամբ: Է. Ժողովում, պահում և շահեցնում է բոլոր թեմապատկան հասոյթները և արդիւնքները. կատարում է թեմական ընդհանուր ծախքերը և առհասարակ վերջնական վճիռներ է կայացնում թեմի ընդհանուր տնտեսական հարցերի մասին, ղեկավարու-

լով նախահաշուի: Թող է տալիս յիսուն թումանից ա-
ւելի ծախսեր անել վանքերի և եկեղեցիների վրայ է. Թողտ-
ուեթիւն և ժապաւինեալ մատեաններ է տալիս հանգանակու-
թիւններ անելու Ատրպատականի թեմում, ինչպէս և թեմից
դուրս ը. Նշանակում է թեմական տեսուչ թեմի բոլոր եկե-
ղեցական-համայնական կրթական հաստատութիւններին վե-
րահսկելու համար: Թ. Հարկաւոր դէպքերում նշանակում է վե-
րաքննիչներ (ռեվիւորներ) եկեղեցական-համայնական հաստա-
տութիւնների գործերն ու հաշիւները վերաստուգելու համար:
Ժ. Հաստատում է պաշտօնում և հրաժարեցնում է զպրոցների
հոգաբարձութիւններին, գործակալական խորհրդականներին, և-
րեսիօներին և ծխական խորհրդականներին. հաստատում և
հեռացնում է ուսուցիչներին՝ հոգաբարձութիւնների առաջար-
կութեամբ: Ժա. Մանրամասն ուսումնասիրութիւն պահանջող
հարցեր քննելու համար ընտրում է յանձնաժողովներ իր միջից
կամ զրտի անձերից, որոնք հարցը ուսումնասիրելուց յետոյ՝
գեկուցադիր են ներկայացնում թեմական խորհրդին: Ժբ. Ա-
մեն տարի բաժանում է գործակալական և ծխական խորհուրդ-
ներին հարկաւոր նոր ժապաւինեալ մատեաններ և յետ ստա-
նում հները: Ժգ. Որոշում է մանրամասն հրահանգով թեմա-
կան, գործակալական և ծխական խորհուրդների կողմից աը-
րուող, հաստատուող և վաւերացուող վաւերաթղթերի համար
վճարելիք թղթատուրքի քանակը և գանձման ձևը և առաջար-
կում թեմական ժողովին ի հաստատութիւն: Ժդ. Տարին մի
անգամ գեկուցադիր է մատուցանում ամենայն հայոց կաթու-
ղեկոսին թեմի կացութեան մասին: Երկու տարին մի անգամ
թեմական ժողովին մանրամասն հաշիւ է ներկայացնում թեմի
եկեղեցական-համայնական գործերի, գոյքերի և հիմնարկութիւն-
ների վիճակի և կառավարութեան մասին, այլ և բոլոր հաստա-
տութիւնների և պաշտօնեաների գործունէութեան մասին: Թե-
մական խորհուրդը պարտաւոր է թեմական ժողովի սովորական
նիստից առնուազն մի ամիս առաջ պատրաստ ունենալ այս
ընդհանուր հաշիւը, այլ և իր գործունէութեան վերաբերող ա-
մեն տեսակ վաւերաթղթեր՝ ըստ պահանջման վերաստուգող
յանձնաժողովին յանձնելու համար: Ժե. Իբրև նոտարական հաս-
տատութիւն՝ հաստատում է ազգայինների կտակագիրը, մուր-
հակները, կալուածագրերը, կապալաթղթերը և այլ այդպիսի
փաստաթղթեր և վաւերացնում է իրան զիմուղների ստորագը-
րութիւնը: Ժզ. Իբրև առաջին ատեան՝ քննում է պատկալուծու-
թեան վերաբերեալ գործերն ու առաջարկում է ամենայն հայոց
կաթուղեկոսին ի տնօրինութիւն. քննում և վճռում է թեմի

բոլոր եկեղեցական-համայնական հաստատութիւնների և պաշտօնեաների կողմից և սրանց դէմ ստացուած բողոքները և դանդառները, այլ և հոգևորականների և ժողովրդի մէջ ծագած տարաձայնութիւնները՝ ժէ. Իրեն երկրորդ ատեան՝ քննում և վճռում է այն բոլոր վէճերը, խնդիրները և դանդառները (ամուսնական, ժառանգական և այլն), որոնք սկսուել են դործակալական խորհրդում. այլ և վճռում է խնամակալութեան վերաբերեալ բոլոր հարցերը»:

Թեմական խորհրդի իրաւասութեան շրջանը որոշող այս յօդուածը արդէն Թիֆլիսի նախագծում աւելի լիակատար կերպով մշակուած լինելով՝ փոփոխութիւնները այնքան կարեւոր չեն: Հիմնական կանոնադրութեան այդ (48-րդ) յօդուածի բոլոր կէտերը, բացի բ, գ, դ, և ժգ-րդ կէտերից, գրեթէ անփոփոխ կրկնութիւն են Թիֆլիսի նախագծում եղած յօդուածների: Իսկ այդ բ, գ, դ, և ժգ-րդ կէտերով հիմնական կանոնադրութիւնը սահմանափակում է թեմական խորհրդի իշխանութիւնը յօգուած թեմական ժողովի իրաւասութեան: գ. կէտում փոխուած է այն կտորը, որ նոր վանքեր հիմնելու խնդրին էր վերաբերում, վերջնական որոշումը թեմական ժողովից կախուած յայտարարելով: բ-րդ և դ-րդ կէտերը թեմական խորհրդին՝ եկեղեցական-համայնական հաստատութիւնների կանոնադրութիւնների լոկ նախագիծը կազմելու իրաւունք են տալիս (հաստատելու իրաւունքը թեմական ժողովին վերապահելով), և միայն նոր հիմնուելիք կրթական և բարեգործական հաստատութիւնների համար թոյլ է տրուում, որպէս բացառութիւն, որ մի առժամանակ պարտադիր ոյժ ունենան թեմական խորհրդի կազմած և «ժամանակաւորապէս հաստատուած» կանոնադրութիւնները, պահանջելով միևնոյն ժամանակ, որ այդ ժամանակաւոր կանոնադրութիւնները պարտաւորապէս ներկայացուեն առաջիկայ թեմական ժողովի հաստատութեանը: ժգ-րդ կէտը թղթատուրքի քանակը և գանձման ձևը որոշող հրահանգի լոկ նախագիծը կազմելու իրաւունք է տալիս թեմական խորհրդին, հաստատելը թեմական ժողովին վերապահելով:

Թեմական առաջնորդին են վերաբերում յետագայ վեց յօդուածը. 35. Հայաստանեայց եկեղեցու կանոնների համաձայն՝ թեմական առաջնորդին անորոշ ժամանակով ընտրում է թեմական ժողովը և առաջարկում ամենայն հայոց կաթողիկոսին ի հաստատութիւն: Ամենայն հայոց կաթողիկոսը հաստատում է ընտրուածին և միջնորդում է Իրանի շահնշահի առաջ ճանաչել նրան ամենայն հայոց կաթողիկոսի փոխանորդ Ատրպատականի թեմում: 36. Թեմական առաջնորդը միանձնաբար տը-

նորինում է թեմի զուտ կրօնական գործերը իր աստիճանին և պաշտօնին յատկացուած իրաւունքների սահմաններում և հրահրում է հայաստանեայց եկեղեցու կանոնների և ծէսերի անթերի կատարման և հոգեորականների ու բոլոր պաշտօնեաների հարազատ պաշտօնավարութեան վրայ: 37. Թեմական առաջնորդը պարտաւոր է այցելել ամբողջ թեմը առնուազն չորս տարին անգամ: Թեմում չըջագայեցիս թեմական առաջնորդը առանձին ուշադրութիւն է դարձնում ժողովրդի, հոգեորականութեան, եկեղեցիների, վանքերի և եկեղեցական-համայնական կրթական ու բարեգործական բոլոր հաստատութիւնների վիճակի վրայ, անհրաժեշտ դէպքերում հարկաւոր կարգադրութիւններ անելով, որոնց մասին հաղորդում է թեմական խորհրդին: 38. Թեմական առաջնորդը պատաւոր նախագահ է թեմական ժողովի. ի պաշտօնէ նախագահում է թեմական խորհրդին. նշանակում և հրաժարելնում է առաջնորդական տեղապահին, առաջնորդական փոխանորդներին (տես 42 յօդ.), վանահայրին. եթէ ունի եպիսկոպոսական աստիճան, ձեռնադրում է քահանաներ և այլ եկեղեցական սպասաւորներ հայաստանեայց եկեղեցու կանոնների համաձայն. իսկ կուսակիցներին ձեռնադրութեան համար հայցում է ամենայն հայոց կաթողիկոսի թոյլտուութիւնը: Ծանօթութիւն ա. Ատրպատականի թեմում ոչ ոք իրաւունք չ'ունի ձեռնադրութիւն կատարելու առանց թեմի առաջնորդի գրաւոր թոյլտուութեան: Ծանօթ. Բ. առաջնորդի մասնակցութեամբ կատարուած օրինակատարութիւնների և ծէսերի համար ստացուող աջահամրոյրը կազմում է առաջնորդի անձնական եկամուտը: 39. Թեմական առաջնորդը հանդիսանում է թեմի ներկայացուցիչ ամենայն հայոց կաթողիկոսի, պարսից կառավարութեան և այլ պետութեանց զիւանագիտական մարմինների առաջ: 40. Թեմական առաջնորդը թեմից բացակայելու համար հայցում է ամենայն հայոց կաթողիկոսի թոյլտուութիւնը:

Առաջնորդական տեղապահին և առաջնորդական փոխանորդներին նուիրուած է մի-մի յօդուած: «41. Առաջնորդական տեղապահը նշանակուած է հոգեորականներից: Առաջնորդական տեղապահը ի պաշտօնէ անդամակցում է թեմական խորհրդին: Թեմական առաջնորդի բացակայութեան, տկարութեան, այլ և առաջնորդական ակտիւ թափուր եղած ժամանակ՝ առաջնորդական տեղապահը ունի առաջնորդական բոլոր վարչական իրաւունքները: 42. Ատրպատականի թեմը ունի երկու փոխանորդութիւն՝ Սալմաստ-Ուրմիի և Ղարաղաղի: Առաջնորդական փոխանորդներին նշանակում է կուսակից հոգեորականներից և

պաշտօնից հրաժարեցնում է թեմական առաջնորդը ամենայն հայոց կաթողիկոսի հաստատութեամբ: Առաջնորդական փոխանորդների իրաւունքները և պարտականութիւնները որոշում է թեմական ժողովը՝ թեմական առաջնորդի հաստատութեամբ»:

Գործակալութեան խորհրդի իրաւասութեան շրջանը որոշում է 61-րդ յօդուածը: «Գործակալութեան խորհուրդը ա) մերձաւոր հսկողութիւն ունի գործակալութեան բոլոր եկեղեցական-համայնական հաստատութիւնների և պաշտօնեանների վարչական գործունէութեան վրայ: բ) Պարտաւոր է գործակալութեան բոլոր եկեղեցական-համայնական հաստատութիւնների վիճակի ու կառավարութեան, ինչպէս նաև պաշտօնեանների վարչական գործունէութեան մասին տարին մի անգամ տեղեկագիր ուղարկել թեմական խորհուրդին: գ) Ժողովում և երեք ամիսը մի անգամ օրինաւոր ցուցակագրութեամբ ուղարկում է թեմական խորհուրդին գործակալութեան բոլոր թեմապատկան հասոյթները և արդիւնքները: դ) Ամեն տարուայ սկզբին գործակալութեան բոլոր ծխական խորհուրդներին բաժանում է թեմական խորհուրդներից ստացուած նոր ժապաւինեալ մատենաները՝ քահանաներին և երեսփոխներին յանձնուելու համար, և հները վերցնելով ուղարկում է թեմական խորհրդին, պահելով պատճէնները: ե) Հաստատում և վաւերացնում է ազգայինների փաստաթղթերը և ստորագրութիւնները և տալիս է մետրիկական քաղուածքներ: զ) Հաստատում է խնամակալներ մեռած ազգայիններից յետոյ մնացած գոյքերի և որբերի վրայ, հրաժարեցնում է եղած խնամակալներին, թոյլ է տալիս խնամակալներին ծախսեր անել որբերի և գոյքերի վրայ մինչև յիսուն թուման, աւելի մեծ ծախսերի, ինչպէս նաև որրապատկան գոյքերը գրաւ դնելու և ծախելու համար դիմելով թեմական խորհուրդին: է) Իբրև առաջին ատեան՝ քննում է գործակալութեան մէջ ապրող հայերի ամուսնական խնդիրները, չհասութեան կասկածելի դէպքերում դիմելով թեմական առաջնորդին (յօդ. 19-րդ) և իրան դիմողների բոլոր կալուածական, ժառանգական և այլ վէճերն ու խորհուրդները»:

Գալով ծխական օրգանների իրաւասութեանը վերաբերալ յօդուածներին, նախ և առաջ յիշատակենք, որ հաստատուած հիմնական կանոնադրութեան 73-րդ յօդուածի համաձայն՝ «բացի այս հիմնական կանոնադրութեան յօդուածներից՝ ծխական համայնքի համար պարտաւորապէս գործադրելի է ընդհանուր հայաստանեայց եկեղեցու ծխական կանոնադրութիւնը (տե՛ս «Արարատ» 1902, մարտ-ապրիլ) այն փոփոխութիւններով, որ կը սահմանէ Ատրպատականի թեմական ժողովը, ի նկատի ունե-

նախով թեմի եկեղեցական-համայնական կազմակերպությունը, տեղական համայնքերի պետքերը, ղեկավարությունով հայոց կանոնական իրաւունքով և այս հիմնական կանոնադրութեամբ և առաջարկելով ամենայն հայոց կաթողիկոսի հաստատութեանը*): Ծխական ժողովի իրաւասութիւնը անսխալորէն որոշելու է այդ ծխական կանոնադրութեան 19-րդ յօդուածը: Ծխական խորհրդի (որպիսի հիմնարկութեան մասին, ինչպէս ասացի, ծխական կանոնադրութեան մէջ կանոն չը կայ) իրաւասութիւնը սահմանում են հիմնական կանոնադրութեան 68 և 69-րդ յօդուածները: «68. Ծխական խորհուրդը ա) կառավարում է ծխական համայնքի բոլոր եկեղեցական-համայնական գործերը և հաստատութիւնները, միեւնոյն ժամանակ հանդիսանալով նաև հոգաբարձութիւն ծխական դպրոցների համար, բ) հսկում է երեսփոխի և ծխական համայնքի բոլոր պաշտօնեաների գործունէութեան վրայ, գ) վաւերացնում է ծխականների ստորագրութիւնները, դ) ունի նաև այն բոլոր իրաւունքները և պարտականութիւնները, որ հայաստանայց եկեղեցու ծխական կանոնադրութիւնը սահմանել է հաշտեանների համար (տես ծխական կանոնադրութիւնը §§ 20, դ. 73, 74, 82-87, 89), ե) վճռում է իրան դիմող ծխականների վճեքը, զ) ընտրում է խնամակալներ մեռած ծրխականներից յետոյ մնացած գոյքի և որբերի վրայ և առաջարկում է ի հաստատութիւն գործակալական խորհրդի: 69. Իրան վերապահելով ընդհանուր վերահսկողութեան և հաշտեանական իրաւունքը՝ ծխական ժողովը կարող է ծխական խորհրդին յանձնել իր իրաւասութեանը պատկանող (տես ծխական կանոնադրութեան § 19) այս կամայն գործի տնտեսութիւնը. «71 և 72 յօդուածները մասամբ կրկնում, մասամբ էլ փոփոխում են երեսփոխի գործունէութեան վերաբերեալ ծխական կանոնադրութեան համապատասխան կանոնները»: 71. Երեսփոխը ծխական խորհրդի գանձապահն է և պարտաւոր է գանձել, պահել և շահեցնել ծրխական հասոյթները և արդիւնքները, հաւաքել և ամեն ամիսը մի անգամ ուղարկել գործակալական խորհրդին իր ծխի թեմապատկան հասոյթները, կատարել եկեղեցու համար անհրաժեշտ ծախսերը մինչև տասն և հինգ թուման ինքնագլուխ, աւելի ծախսերի համար մինչև յիսուն թուման՝ ստանալով ծխական

*) Ուսումնասիրած լինելով թէ՛ ծխական կանոնադրութիւնը և թէ՛ ներկայ հիմնական կանոնադրութիւնը՝ ես պարտքս համարեցի ենթարկել ծխական կանոնադրութիւնը սոյն յօդուածով պահանջուած փոփոխութիւններին և ներկայացնել Արապատկանի թեմի դ. առաջնորդին՝ թեմական ժողովի հաւանութեանը առաջարկելու համար:

ժողովի համաձայնութիւնը և գործակալական խորհրդի զրաւեր թոյլտուութիւնը, իսկ աւելի ևս մեծ ծախսերի համար— թեմական խորհրդի թոյլտուութիւնը: 72. Երեսփոխը պարտաւոր է ամեն տարի մի անգամ ծխական ժողովի սովորական տարեկան նիստին, որի ժամանակը որոշում է թեմական ժողովը, մանրամասն հաշիւ ներկայայնել, որպիսին ծխական ժողովը հաստատում է՝ ծխական խորհրդի զեկուցագիրը լսելուց յետոյ:

Օրգանների կազմը, համաձայն Ծ-րդ ընդհանուր կանոնում յիշատակուած՝ մեր կանոնական իրաւունքի հիմնական սկզբունքի, ընտրութեամբ է հաստատուում ժողովների կազմը համայնքից է ընտրուում, իսկ խորհուրդներինը ժողովրդից: Ժողովների կազմի ընտրութեան մասին արդէն խօսք եղել է. անցնենք ուրեմն խորհուրդներին:

«43. Աւարպատականի թեմական խորհուրդը բաղկանում է ութը հոգուց՝ երկու ի պաշտօնէ անդամներից, որ են թեմական առաջնորդը և առաջնորդական տեղապահը, և վեց թեմական խորհրդականներից, որոնց ընտրում է թեմական ժողովը չորս տարի ժամանակով թաւրիղաբնակ հոգեւորականներից կամ աշխարհականներից: Թեմական խորհրդականների կէսը իւրաքանչիւր երկու տարին լրանալուց յետոյ հերթով դուրս է գալիս: Ընտրութեան ժամանակ ամենից շատ ձայն ստացողը համարւում է աւագ անդամ թեմական խորհրդի: Ծանօթութիւն ա. այս հիմնական կանոնադրութեան գործադրութեան առաջին երկու տարուց յետոյ թեմական խորհրդականների կէսը դուրս է գնում վիճակով, իսկ այնուհետև հերթով ծանօթ. բ. թեմական խորհուրդը թաւրիղի գործակալութեան համար հանդիսանում է նաև գործակալական խորհուրդը: Ծանօթ. գ. թեմական խորհրդի կազմի և արա մէջ տեղի ունեցող փոփոխութիւնների մասին թեմական առաջնորդը իւրաքանչիւր անգամ զեկուցանում է ամենայ հայոց կաթողիկոսին»:

Թիֆլիսի նախագծի համապատասխան յօդուածի համեմատութեամբ՝ այստեղ մի կարևոր փոփոխութիւն է արուած: Թիֆլիսի նախագիծով՝ թեմական խորհրդականների ընտրութիւնը լինում էր չորս տարին մի անգամ և բոլոր վեց խորհրդականները միանգամից էին ընտրուում, և բոլոր խորհրդականների իրաւագորութեան քառամեայ ժամանակամիջոցը միևնոյն ժամանակ սկսուելով՝ միասին էլ վերջանում էր, և նոր ընտրութեան ժամանակ նորից ընտրելու էր բոլոր վեց խորհրդականներին: Հիմընական կանոնադրութիւնը անփոփոխ պահելով թեմական խորհրդականների իրաւագորութեան քառամեայ ժամանակամիջոցը, փոխում է ընտրութեան կարգը այսպէս. ընտրութիւնը

լինում է իւրաքանչիւր երկու տարին մի անգամ և իւրաքանչիւր ընտրութեան ժամանակ ընտրում են ոչ թէ բոլոր խորհրդականներին, այլ միայն կէսը. այնպէս որ բոլոր խորհրդականներին իրաւագորութեան ժամանակամիջոցը միասին չէ սկսում և միասին վերջանում, այլ կէս-կէս. իւրաքանչիւր երկու տարի խորհրդականներից միայն երեքի իրաւագորութեան ժամանակն է լրանում, իսկ երեքինը դեռ տնկու է կրկին երկու տարի. այնպէս որ նորընտիր երեք խորհրդականները միանում են հին կազմից մնացած երեքի հետ և այս փոփոխութիւնը այն առաւելութիւնն ունի, որ թեմական խորհրդի ամբողջ կազմի միանգամից փոփոխուելու առաջն է առնում, որով այդ կառավարիչ մշտական օրգանի գործունէութեան մէջ անհրաժեշտ անընդհատ յաջորդակցութիւն է հաստատուում։ Երեսփոխանական (պատգամաւորներից կազմուող) և պարբերաբար դումարուող հիմնարկութիւնների (ժողովների) համար այդ յաջորդակցութիւնը մի անհրաժեշտութիւն է։ Նոյնիսկ երբեմն ընդհակառակը, անհրաժեշտ է համարւում, որ երեսփոխանական ժողովի կազմը ամբողջովին նորոգուի, որպէսզի նոր նստաշրջանում ժողովրդի նոր ներկայացուցիչներ հանդէս գան, նորանոր և զանազան ժողովրդական հոսանքներ արտայայտութիւն գտնեն։ Բայց նոյն բանը չէ կարելի ասել նաև մշտական գործադիր օրգանների համար։ Եթէ մի օր յանկարծ միանգամից փոխւում է այսպիսի ատեանի ամբողջ կազմը և հրենքի փոխարէն բոլորն էլ նոր մարդիկ են գալիս, գործերին, խորհրդի ղեկանին և ընթացիկ վարչական գործնականին (պրակտիկային) բոլորովին անծանօթ, ապա այսպիսի դէպքում անխուստիակի կերպով բաղմամբ անտեղութիւններ, անյարմարութիւններ, անտեղակութեան և անփորձութեան սխալներ են տեղի ունենում. էլ չեմ ասում ժամանակի կորուստի մասին, որի պատճառն է նորեկ անդամների գործերի հետ ծանօթանալու և ընտելանալու կարիքը։ Նորակազմ ատեանի գործունէութեան գրեթէ ամբողջ առաջին տարին այսպիսի պայմաններում սովորաբար ապարդիւն է անցնում*)։ Մշտական օրգանների կազմի անընդհատ յաջորդակցութեան անհրաժեշտութիւնը չնչտելիս՝ նպատակս չէ պնդել, թէ այդ օրգանների գործունէութեան մէջ ոչ մի նորութիւն, թարմութիւն, փոփոխութիւն պէտք է չը լինի, — որ մինչոյն ուղղութիւնը, միևնոյն ոգին, միևնոյն

*) Այս բոլորը ի նկատի ունենալով՝ ցանկալի է, որ մեր հոգևոր դպրանոցները հոգաբարձութիւնները կազմի ընտրութեան եղանակը փոփոխէր համառոտ յաջորդակցութեան սկզբունքին։

սովորոյթը և գործնականը միշտ պէտք է առաջնորդէ այդ օրգանների գործունէութեանը: Ոչ՝. նորոգող, թարմացնող և փոփոխող հոսանքներ շատ և շատ ցանկալի են: Սակայն, մշտական օրգանի գործունէութեան իւրաքանչիւր նոր շրջան անցեալի կրկնութիւնը չը լինելով հանդերձ, պէտք է անցեալի շարունակութիւնը լինի. այսինքն անցեալի հետ կապակցուած լինի, անցեալի վրայ յենուել, անցեալը ի նկատի ունենայ իբր իրական յենակէտ իւրաքանչիւր նոր քայլի համար Ահա այս բոլորը ի նկատի առնելով՝ հիմնական իմաստադրութիւնը սահմանուած է. «Թեմական խորհրդականների կէսը իւրաքանչիւր երկու տարին լրանալուց յետոյ հերթով դուրս է գալիս»: Ուրիշ խօսքով՝ իւրաքանչիւր անգամ խորհրդի եղած կազմի կիսից աւելին փոխուել չէ կարող: Սակայն կարող է կազմը և անփոփոխ նոյնը մնալ, եթէ «դուրս եկող» խորհրդականները, այսինքն այն խորհրդականները, որոնց պաշտօնէութեան ժամանակամիջոցը լրացել է, կրկին ընտրուեն (վերընտրուեն) նոր քառամեակի համար: Յամենայն դէպս՝ իւրաքանչիւր անգամ, խորհրդականների կիսի պաշտօնավարութեան ժամանակամիջոցը լրանալիս, միւս կէսը դեռ կը շարունակէ դարձեալ երկու տարի մնալ պաշտօնում և վարել գործերը նորեկ—նորընտիր կամ վերընտիր խորհրդականների հետ:

Դժբախտաբար նոյն կարգը սահմանուած չէ նաև գործակալական խորհրդի համար: «58. Իւրաքանչիւր գործակալութիւն ունի իւր խորհուրդը, որ բաղկանում է գործակալ քահանայից և երեք գործակալական խորհրդականներից: Գործակալ քահանային նշանակում է թեմի առաջնորդը. իսկ գործակալական խորհրդականներին ընտրում է աշխարհականներից կամ հոգևորականներից գործակալութեան ժողովը չորս տարի ժամանակով և առաջարկում է թեմ. խորհրդին ի հաստատութիւն: Գործակալական խորհրդականներից մէկին գործակալական խորհուրդը ընտրում է նախանգամ երկու տարի ժամանակով»^{*)}

^{*)} 59-րդ յօդուածը ունի երեք ծանօթութիւն: «Ծանօթ. ա. գործակալութեան ժողովը ընտրում է նաև երկու գործակալական փոխխորհրդականներ, որոնք փոխարինում են գործակալական խորհրդականներին սրանց երկուստե բացակայութեան կամ տկարութեան ժամանակ իրանց ընտրութեան ձայնից առաւելութեան կարգով: Ծանօթ. բ. փոխանորդանիստ կենտրոնավայրում առաջնորդական փոխանորդը կատարում է նաև գործակալի պաշտօն: Ծանօթ. գ. գործակալական խորհուրդը հանդիսանում է նաև ծխական խորհուրդ գործակալութեան կենտրոնի աւագ եկեղեցու համար, ուստի և ծխական խորհրդի իրաւասութեանը վերաբերող հարցեր վճռելիս պարտաւոր իրէ նխաեւին հրաւիրել նաև նոյն եկեղեցու երեսփոխին»:

Ամենայն հաւանականութեամբ ներկայ հիմնական կանոնադրութեան՝ թեմական ժողովի նախաձեռնութեամբ փոփոխելի յօդուածներից առաջինն այս յօդուածն է լինելու. փոփոխութիւնը կատարելիս յարմար կը լինի գործակալական խորհրդականների թիւը զոյգ թիւ վերածել (օր չորսի) և ամբողջ յօդուածը խմբագրել 43-րդ յօդուածի և նրա ա. ծանօթութեան համեմատ: Նոյնպիսի փոփոխութեան յարմար կը լինի ենթարկել նաև ծխական խորհրդականներին վերաբերեալ յետագայ 66-րդ յօդուածը. «Իւրաքանչիւր ծխական եկեղեցի ունի իւր ծխական խորհուրդը, որ կազմուում է նոյն եկեղեցու աւագ քահանայից, երեսփոխից և երեք ծխական խորհրդականներից, որոնց ընտրուում է ծխական ժողովը չորս տարի ժամանակով իր զրադէտ անդամներից և առաջարկում թեմական խորհրդին ի հաստատութիւն»:

Ժողովների համար անձնափոխանորդներ աւելորդ համարելով, խորհուրդների համար, ընդհակառակը, աւելի յարմար դատուեց ընտրել փոխխորհրդականներ՝ բացի ծխական խորհրդից: «44. Թեմական ժողովը ընտրում է թաւրիգաբնակ հոգևորականներից կամ աշխարհականներից նաև չորս թեմական փոխխորհրդականներ, որոնք փոխարինում են թեմական խորհրդականներին նրանց երկարատև բացակայութեան կամ տկարութեան ժամանակ իրանց ընտրութեան ձայնից առաւելութեան կարգով» Գործակալական փոխխորհրդականների մասին տես վերևում, 58-րդ յօդուածի ա. ծանօթութիւնը:

Ժողովների և խորհուրդների պաշտօնական գործունէութեան և գործավարութեան եղանակն ու ձևերը որոշում են (թէ և ոչ լիակատար կերպով) յետագայ յօդուածները.

Թեմական ժողովի համար *) : «25. Պատգամաւորներին ժողովի հրաւիրելու իրաւունք ունին՝ ա) թեմի առաջնորդը, բ) պատգամաւորների 1/2 մասը և գ) թեմի առաջնորդի բացակայութեան ժամանակ առաջնորդական տեղապահը: 26. Թեմական ժողովը սովորաբար գումարւում է երկու տարին մի անգամ: Անյետաձգելի հարցեր վճռելու համար և հարկ եղած դէպքում՝ կարող են գումարուել բացի այդ սովորական նիստից թեմական ժողովի նաև արտակարգ նիստեր: Ծանօթութիւն ա. պատգամաւորների ընտրութեան համար թեմական խորհրդից օրոշ

*) Գործակալութեան ժողովի համար մի հատ յօդուած կայ, որ առաջ եմ բերում. «57. Ներկայացուցիչներին գործակալական ժողովի է հրաւիրում և ժողովին նախագահում է գործակալ քահանան, իսկ սրա բացակայութեան դէպքում գործակալական խորհրդի նախանգամը»:

ժամանակամիջոց է նշանակւում, որից անմիջապէս յետոյ, ինչպէս և առհասարակ թեմական ժողովի սովորական նիստեր գումարելու դէպքերում՝ թեմական առաջնորդը, կամ սրան փոխարինող առաջնորդական տեղապահը և կամ սրանց բացակայութեան դէպքում թեմական խորհրդի աւագ անդամը, պարտաւոր է պատգամաւորներին թեմական ժողովի հրաւիրել ծանօթ. ք. թեմական առաջնորդի մահուան, հրաժարման կամ հրաժարեցնելու դէպքում պատգամաւորները անմիջապէս ժողովի են հրաւիրւում առաջնորդ ընտրելու. ծանօթ. գ. թեմական ժողովը գումարւում է թաւրիզի մայր եկեղեցում. 27. թեմական ժողովի պատւաւոր նախագահն է առաջնորդը, իսկ ժողովի նիստերը կառավարւում է առանձին ատենապետ, որին ժողովն ընտրւում է իր անդամներից իւրաքանչիւր նստաշրջանի համար. ծանօթութիւն. թեմական առաջնորդը, թեմական խորհուրդը և սրա քարտուղարը ներկայ են լինում ժողովի նիստերին՝ հարկաւոր հաշիւներ և տեղեկութիւններ հաղորդելու համար. 28. թեմական առաջնորդին հրաժարեցնելու և այս հիմնական կանոնադրութիւնը փոփոխելու և լրացնելու հարցերը վճռւում են բոլոր պատգամաւորների ձայների $\frac{2}{3}$ բազմութեամբ»

Հիմնական կանոնադրութեան 27-րդ յօդուածը տարբերւում է Թիֆլիսի նախագծի համապատասխան յօդուածից. Մինչդեռ Թիֆլիսի նախագիծը տնօրինում էր, թէ թեմական ժողովին նախագահում է թեմական առաջնորդը, հիմնական կանոնադրութեան 27-րդ յօդուածի համաձայն՝ թեմական առաջնորդը թեմական ժողովի միայն «պատւաւոր նախագահն է». նա ժողովի կազմին մասնակից չէ, ժողովի նիստերին չէ նախագահում և կառավարւում. թեմական ժողովը յատուկ ատենապետ ունի, որին ժողովն ընտրւում է իր անդամներից. Այս կարևոր փոփոխութիւնն ունի մի քանի պատճառներ. թեմական առաջնորդին ընտրւում և հրաժարեցնւում է պաշտօնից թեմական ժողովը. նոյն ժողովի «վերին և ընդհանուր հսկողութեան և հաշւառութեան» ենթակայ է առաջնորդի ղործունէութիւնը. Այս բոլորը այնպիսի հանգամանքներ են, որոնք անյարմար են դարձնում թեմական առաջնորդի համար նախագահելը թեմական ժողովի նիստերին. Թիֆլիսի նախագիծն էլ նախատեսել էր այս անյարմարութիւնը և տնօրինել, որ «առաջնորդի անձնաւորութեան վերաբերեալ հարցեր քննելիս՝ թեմական ժողովին նախագահում է ոչ թէ առաջնորդը, այլ առաջնորդական տեղապահը»։ Սակայն, առաջնորդական տեղապահի նախագահութեան դեմ կարելի է առաջ բերել թէ առաջնորդի նկատմամբ նոր բացառութեամբ առաջարկութիւնը և թէ այն յատուկ հանգամանքը,

որ առաջնորդական տեղապահին, որպէս միայն թեմական առաջնորդից նշանակուած մի պաշտօնեայի, որ թեմական ժողովից ընտրուած չէ, հազիւ թէ վայելուչ լինէր թեմական ժողովին նախագահելու իրաւունքը տալ: Էլ չեմ ասում, որ առաջնորդական տեղապահը իրան նշանակող առաջնորդի մարդը (alter ego-ն) լինելով, նոյն առաջնորդի անձնաւորութեանը վերաբերեալ հարցերում երբէք չէզոք անձ նկատուելու չէ: Բացի այս բոլորից, Թիֆլիսի նախագծի այս յօդուածը նաև թերի էր. նա նախատեսել էր առաջնորդի նախագահութիւնը արգելող միայն այն հանգամանքները, որոնք կապ ունենա առաջնորդի անձնաւորութեան և առաջնորդական գործունէութեան վերաբերեալ հարցերի հետ: Բայց արգելափթ մի այլ կարևոր հանգամանք էլ կայ, — այն՝ որ թեմ. առաջնորդը թեմ. խորհ. նախագահն է և հետեապէս թեմ. խորհ. կարծիքներին և գործունէութեան ներկայացուցիչ և պաշտպան: Հետեապէս, թեմ. առաջնորդը պէտք է չը նախագահէ թեմական ժողովի նիստերին նաև այն բոլոր դէպքերում, երբ ժողովում քննուելու խնդիրը որեւէ կապ ունի նաև թեմական խորհրդի գործունէութեան հետ: Ուրիշ խօսքով՝ դրեթէ ամեն դէպքում թեմական առաջնորդը անկարող պիտի լինի նախագահել թեմական ժողովին: Թեմական ժողովի ատենապետի պաշտօնը և թեմական խորհրդի նախագահի պաշտօնը միմիանցից բաժանելու առաւելութիւններից մէկն էլ այն է, որ այդպիսով այս երկու հիմնարկութիւնների գործունէութիւնը բոլորովին անկախ, ինքնուրոյն ընաւորութիւն և արժէք կ'ունենայ, մէկի կարծիքը ոչ մի ճշում չի գործի միւսի վրայ, անաշտ և ազատ քննադատութեան կ'ենթարկուելի միւսի կողմից. այսպիսով իրօք երկու հիմնարկութիւն կը լինեն զբաղմունք, և խնդիրները իրօք կրկին քննութեան կ'ենթարկուեն: Թեմական խորհրդի համար էլ այս բաժանումը այն առաւելութիւնը կ'ունենայ, որ թեմական ժողովին կը ներկայացուել իսկապէս խորհրդի կարծիքը և ենթագրութիւնը և ոչ թէ խորհրդում յայտնուած այն կարծիքը, որի կողմնակիցն է եղել թեմական առաջնորդը:

«29. Թեմական ժողովը իր միջից կամ զրոսից ընտրում է մի քարտուղար, որ կազմում է ժողովի նիստերի արձանագրութիւնը: Ծանօթութիւն. ժողովի արձանագրութիւնները վաւերական են, երբ վաւերացուած են ներկայ եղող պատգամաւորների մեծամասնութեան ստորագրութեամբ, իսկ 28-րդ յօդուածում նախատեսուած դէպքում — բոլոր պատգամաւորների $\frac{2}{3}$ մասի ստորագրութեամբ: 31. Թեմական ժողովի խորհրդածութեանը և վճռահատութեանը առաջարկուող խնդիրները յանձնւում են

թեմական առաջնորդին, որը թեմական ժողովի ատենապետի և թեմական ժողովի ու թեմական խորհուրդի քարտուղարների գործակցութեամբ ղասաւորում է և օրակարգով ներկայացնում թեմական ժողովին: Թեմական ժողովը կարող է փոխել խնդիրներ՝ օրակարգում բռնած հերթը: Խնդիրներ թեմական առաջնորդին կարելի է ներկայացնել թեմական ժողովի նստաշըջանի ամբողջ ընթացքում: 32. Թեմական ժողովը ամենայն հայոց կաթողիկոսի հետ յարաբերութիւն է պահում թեմական առաջնորդի կամ առաջնորդի բացակայութեան դէպքում՝ առաջնորդական տեղապահի միջոցով: Թեմական առաջնորդը կամ առաջնորդական տեղապահը պարտաւոր է թեմական ժողովի որոշումները յընթացս մի եօթնեկի ուղարկել նորին վեհափառութեանը, տեղեկացնելով այդ մասին թեմական ժողովի ատենապետին: Առաջնորդարանի այս կէտում զանցառու գտնուելու դէպքում՝ թեմական ժողովի ատենապետն է կատարում նրա պարտքը:

Թեմական խորհրդի գործաւարութեան եղանակը կարգաւորում են յետագայ յօդուածները: 46. (տե՛ս վերեւում առաջ բերուած): «47. Թեմական խորհրդի նիստերին նախագահում է թեմական առաջնորդը, սրա անկարողութեան դէպքում՝ առաջնորդական տեղապահը, իսկ երբ անկարող է նախագահել նաև առաջնորդական տեղապահը—թեմական խորհրդի աւագ անդամը: 49. Թեմական սնդուկի անմիջական հսկողութիւնը և բանալին յանձնւում է թեմական խորհրդի գանձապահին, որին թեմական խորհուրդը ընտրում է իր միջից չորս տարի ժամանակով փոխադարձ երաշխաւորութեամբ: Ժանւթ[ո]ւթիւն. թեմական խորհուրդը պարտաւոր է իւրաքանչիւր ամիս ստուգել թեմական սնդուկը: 50. Թեմապատկան գումարներից մինչև երկու հարիւր յիսուն թուման պահւում է թեմական սնդուկում, իսկ աւելի գումարները ապահով զրաւականով չահեցնւում են թեմական խորհրդի անունով նոյն խորհրդի օրինաւոր վճռի համաձայն և բոլոր անգամների ընդհանուր պատասխանատուութեամբ: 52. Թեմական առաջնորդը և թեմական խորհուրդը ունեն մի ընդհանուր դիւանատուն, որի համար թեմական խորհուրդը քարտուղար և գրագիրներ է վարձում՝ թեմական առաջնորդի հաստատութեամբ: Քարտուղարը համարւում է գրագիրների անմիջական իշխանաւոր: 53. Դիւանատան քարտուղարը պարտաւոր է պահել ժապաւինեայ մատեաններ թեմական խորհրդի արձանագրութիւնների և գործաւարութեան բոլոր բաժինների համար և հսկել դիւանական բոլոր թղթերի անկորուստ և կանոնաւոր պահպանութեան վրայ: 54. Թեմական խորհրդի բո-

լոր պաշտօնական թղթերը, այն է՝ գրադրութիւններ զանազան անձերի և հաստատութիւնների հետ, արձակած վճիռները, խնդրատուներին տուած վկայագրերը և խորհրդի տուած որոշումների և վճիռների պատճէնները կային, պէտք է կրեն թեմական առաջնորդի կամ առաջնորդական տեղապահի և քարտուղարի ստորագրութիւնները և դրոշմուած լինեն առաջնորդական կնքով»:

Գործակալական խորհրդին վերաբերում են՝ յօդուած 59 (տես վերևում), «60. Գործակալական խորհրդի նիստերին նախագահում է գործակալը, իսկ սրա անկարողութեան դէպքում—նախանգամը: 63. Գործակալական խորհուրդը իւր միջից ընտրում է փոխադարձ երաշխաւորութեամբ մի գանձապահ երկու տարի ժամանակով, որին յանձնում է իւր գրամարկդի անմիջական հսկողութիւնը և բանալին: Ժաննօթուլին. գործակալական խորհուրդը պարտաւոր է ամեն ամիս կատարել իր գրամարկդի ստուգութիւնը: 64. Գործակալական խորհուրդը ունի մի գործաւար, որ պարտաւոր է պահել թեմական խորհրդի կնքով վաւերացուած ժապաւինեալ մատեաններ գործաւարութեան բոլոր բաժինների համար, կանոնաւոր և անկորուստ պահպանել գործակալական խորհրդի բոլոր թղթերը և կազմել նրա նիստերի արձանագրութիւնը: 65. Գործակալական խորհրդի բոլոր պաշտօնական թղթերը պէտք է կրեն նախագահի և գործաւարի ստորագրութիւնները և դրոշմուած լինեն գործակալական խորհրդի կնքով, որ ստանում է թեմական խորհրդից»:

Թիֆլիսի նախագիծը առանձին ուղադրութիւն էր դարձրել ժապաւինեալ մատեանների վրայ, որ մեծ նշանակութիւն ունեն թէ պաշտօնական գործերի ստուգութեան համար և թէ կարևոր վիճակագրական տեղեկութիւններ ունենալու համար: Հիմնական կանոնագրութիւնը զրկեթէ անփոփոխ կրում է այդ յօդուածները:

«51. Թեմական խորհուրդը պարտաւոր է ունենալ՝ ա) ամբողջ թեմի բոլոր եկեղեցական-համայնական հիմնարկութիւնների, այն է՝ շէն ու աւերակ վանքերի ու եկեղեցիների, դպրոցների, գրադարանների և առհասարակ բոլոր կրթական և բարեգործական հաստատութիւնների, և դրանց պատկանող կամ յատկացուած անշարժ գոյքի տպագրած մանրամասն ցուցակը, բ) ամբողջ թեմի հայ ազգաբնակչութեան աճման, մահացութեան և ամուսնութիւնների վիճակագրական աղիւսակները՝ գործակալական խորհուրդների չափաբերականներից քաղուած տեղեկութիւնների համաձայն և գ) ժապաւինեալ մա-

տեաններ թեմի բոլոր եկեղեցական-համայնական պաշտօնեաների անուանացուցակով և եկեղեցական-համայնական հիմնարկություններին պատկանող կամ յատկացուած շարժական գույքերի, այն է՝ դրամագլուխների, անօթեղէնի, զարդերի, գրքերի, կահկարասիքի ևայլն, մանրամասն ցուցակագրութեամբ^{*)}»:

Այդ ժապաւինեալ մատեանները թեմական խորհուրդն է բաժանում ամեն տարի գործակալական և ծխական խորհուրդներին և ամեն տարուայ վերջը յետ է ստանում իր գիւտնում պահելու համար (տես յօդ. 48, ժբ. 61, դ.):

Այս է գործադրութեան համար հաստատուած Ատրպատականի հիմնական կանոնադրութեան բովանդակութիւնը^{**)}:

Կանոնադրութիւնը անյապաղ գործադրման յանձնուած լինելով՝ ուրեմն շուտով կազմակերպուելու և գործելու են թեմի կառավարիչ հիմնարկութիւնները՝ Թիֆլիսի նախագծի 28-րդ յօդուածը այսպէս էր սկսում. «Այս կանոնադրութիւնը ամենայն հայոց կաթողիկոսի կողմից հաստատուելուց անմիջապէս յետոյ և այնուհետև պարբերաբար ամեն չորս տարին մի անգամ» պատգամաւորների ընտրութիւն է լինելու թեմական ժողով գումարելու համար... ևայլն... Այս ընդգծուած նախագասութիւնը վերջնական խմբագրութեան ժամանակ դուրս գցուեց (տես հիմն. կան. յօդ. 23), որովհետև ինքնըստինքեան հասկանալի է, որ եթէ մի կանոնադրութիւն հաստատուում և ի գործադրութիւն է յանձնուում, ապա ուրեմն անմիջապէս էլ

*) Նման կանոններ սահմանուած են նաև գործակալական և ծխական խորհուրդների համար: «62. Գործակալական խորհուրդը պարտաւոր է ունենալ ժապաւինեալ մատեաններ՝ գործակալութեան բոլոր եկեղեցական-համայնական հիմնարկութիւնների, սրանց պատկանող կամ յատկացուած անշարժ և շարժական գույքերի, այլ և բոլոր պաշտօնեաների մանրամասն ցուցակագրութեամբ, և ծխական խորհուրդների չափաբերական մատեանները պատճէները: 70. Ծխական խորհուրդը պարտաւոր է ունենալ ժապաւինեալ մատեաններ՝ ծխի մէջ գտնուած բոլոր եկեղեցական-համայնական հիմնարկութիւնների, սրանց պատկանող կամ յատկացուած անշարժ և շարժական գույքերի, այլ և բոլոր պաշտօնեաների մանրամասն ցուցակագրութեամբ, և չափաբերական մատեաններ՝ ծխի բոլոր հայ ընտանիքներում տեղի ունեցած ծնունդների, պսակների և մահացութեան արձանագրութեամբ: Ծխական մատեանների մասին յատուկ յօդուածներ կան նաև ծխական կանոնադրութեան մէջ (տես §§ 72, 88):

**) Հիմնական կանոնադրութիւնը շուտով թեմական ժողովի կարգադրութեամբ հրատարակուելու է Թաւրիզում (տես հիմն. կան. յօդ. 30, ա): Իսկ տալիւն տպագրուած չը լինելով, աշխատեցի այդ կանոնադրութեան բոլոր յօդուածները ամբողջութեամբ և անփոփոխ առաջ բերել յօդուածիս ընթացքում, թէպէտ և ոչ կանոնադրութեան հերթով: Սակայն յօդուածների թահամարները նոյնպէս նշանակուած լինելով, հետաքրքրուողի համար դժուար չի լինի վերականգնել այդ հերթը:

գործադրուելու է: Բացի դրանից՝ «կանոնադրութիւնը հաստատուելուց անմիջապէս յետոյ» ոչ միայն թեմական ժողովի դումարումը պէտք է կատարուի, այլ թեմի նաև միւս բոլոր հիմնարկութիւնները պէտք է պատշաճ կերպով կազմուեն և գործել սկսեն: Ուստի միայն թեմական ժողովի համար այդ յիշելը անտեղի բան կը լինէր:

Պարսկահայերի կուլտուրական յառաջադիմութեան գործում անկասկած մեծ դեր է կատարելու ներկայ հիմնական կանոնադրութիւնը: Օրէնքն ու դպրոցն են ամեն մի ժողովրդի բարգաւաճման գործօնները, հիմքերը: Կանոնապահութեան և լուսաւորութեան համար եղած ջանքերը թող աւելի ու աւելի զարգանան, հաստատուն դառնան և անսպթաք առաջ տանեն պարսկահայերի քաղաքակրթութեան գործը:

ՍԻՐԱԿԱՆ ՏԻԳՐԱՆԵԱՆ